

## **Giuvnas da Trun han gudignau il turnier cantunal da ballapei**

La mesjamna vargada ha il turnier da ballapei cantunal per scolas popularas giu liug a Domat. La 3. superiura dil Consorzi da scola Trun/Sumvitg ei separticipada cun in'equipa da giuvnas ed ina da giuvens. In'ulteriura equipa da giuvens cun scolars dalla 1. e 2. superiura ei medemamein stada dalla partida. Nus essen serendi gia la damaun cul tren allas 07.00 enviers Domat, cunquei ch'ils giuvens han giu lur emprem giug allas 08.50. Las equipas ch'eran buca gest vid dar in giug animavan mintgamai l'equipa sil plaz. Nus tuts havein dau nies meglier pusseivel, tuttina eis ei deplorablamein buca reussiu allas duas equipas da giuvens da far in plaz da podest. Nus – las giuvnas – essan denton vegnidas da sequalificar pil miezfinal. Cun bravura havein nus gudignau quel encunter Claustra ed essan setschentadas el final. En ina dira confruntaziun cun Tavau havein nus aunc ina ga dau tut nies pusseivel ed havein dumignau ellas cun in 1:0. Duront il temps avon il turnier havein nus giuvnas fatg ina sgnocca e mess la finamira da sittar silmeins in gol duront gl'entir di e da buca daventar las davosas da nossa categoria. Che nus fetschien otg gols e gudognien il turnier cun haver incassau gnanc in gol vessen nus mai cartiu. Cun quei success essan nus daventadas campionesas grischunas dallas scolas. Entras quella victoria astgein nus separticipar la proxima primavera al campunadi svizzer da scolas a Basilea.

Natascha Wolf e Giulia Defuns